

1. Aallaqqaasiut

Royal Arctic Line Issittumi, nunarsuatsinni avatangiisini mianernarnerpaat ilaanni, annerusumik angalasarpoq. Naasut uumassusillillu silap pissusiata allannguutaanit avatangiisillu mingutsinneqarnerannit sunnertiapput.

Ingerlatseqatigiiffiup silap pissusianut avatangiisinullu sunniutaata annerpaartaa ingerlatseqatigiiffiup umiarsuaataaneersuuvoq. Ingerlatseqatigiiffiup umiarsualivinni ingerlatsisarnera allaffissorneralu silap pissusianut avatangiisinullu aamma sunniuteqarput.

Piujuartitsineq pillugu periusissiaq 2022-mi saqqummersinneqarpoq, taannalu 2025 ilanngullugu attuuttussanngortinneqarluni. Piujuartitsinerlu pillugu periusissiamut 2023-mi iliuusissatut pilersaarusiortoqassaaq aammalu aaqquissuussinermik suliaqartoqarluni. Piujuartitsineq pillugu periusissiaq iliuusissatullu pilersaarut anguniakkanik ingerlatassanillu aalajangersaaffiupput Royal Arctic Linemut siunissamat piujuartitsiffiunerusumut aqquissuussanik.

2. Nassuiaatit

- **EU-mi piujuartitsinermut tunngasunik ingerlatani taaguusersuilluni immikkoortiterineq:** Tassaavoq EU-p ingalatap avatangiisitigut piujuartitsisutut nalilerneqarsinnaaneranut piumasqaatinik sorlernik naammassisaqarnissaanut nassuiaataa.
- **TCFD - Taskforce on Climate-related Financial Disclosure:** Tassaavoq siunissami silap pissusiata allannguutissaata ingerlatseqatigiiffiup ingerlatsineranut qanoq sunniuteqarnissaannik nalorninartoqarfiusumi ingerlatseqatigiiffiit silap pissusianut naleqqussarnissamik qanoq suliniuteqarsinnaanerannut nunani tamalaani killiliussat.
- **SBTi - Science Based Targets initiative:** Tassaavoq nunani tamalaani killiliussatut sakkussaq, ingerlatseqatigiiffiit gassinik silaannarmik kissakkiartortitsisunik aniatitaasa annertussusaata Nunani Tamalaani Silap pissusia pillugu Aalajangiisartut 1,5°C-inik anguniagaqarnerannut naapertuunneranut tunngatillugu, suliaqarfinni assigiiingitsuni ingerlatseqatigiiffiit gassinik silaannarmik kissakkiartortitsisunik aniatitsinerminnik annikillisaanissamat najoqqutassaannik aalajangersaaffiusoq.
- **CII - Carbon Intensity Indicator:** Umiarsuup qanoq naammassisaqarluartartigineranut, isorartussutsimilu aalajangersimasumi nassiussanik assartuinermi orsussamik qanoq annertutigisumik atuisarneranut uuttuut.
- **IMO:** International Maritime Organization: Naalagaaffiit Peqatigiit Imarsiornermut Suleqatigiiffiat, imaatigut angallannermi isumannaallisaanermut mingutsitsinermullu pissutsinik pingaarnertut suliaqarfiusoq.

3. Siunertaa

Royal Arctic Linep matumani politikki atorlugu ingerlatseqatigiiffiup ingerlatsinerata silap pissusia avatangiisillu sianigilluinnarlugit naammassineqarnissaa qulakkeerniarpa, periusissiatigut anguniakkat iluanni periarfissaasut malillugit kiisalu piginnittup(-ttut) najoqqutassiuussaata pingaarnerusut malillugit. Siunertarineqartoq alla tassaavoq ingerlatseqatigiiffiup silap pissusia avatangiisillu pillugit suliaqarnerani naleqartitatut tunngavissat sulisunit ilisimaneqarnissaat.

Immikkoortortaqaarfik: SESGC	Uannga naqqissornerqarpoq: RARI Akisussaasoq: AVLL Akuersisut: Siulersuisut	Matumani versioni akuerineqarpoq: Juunip 7-iani 2023 Version: 1
------------------------------	---	---

4. Politikki

Teknologiimik ineriartortitsineq

Ingerlatseqatigiiffiup nunarsuaq tamaat isigalugu mikisunnguunera killilinnillu isumalluuteqarnera Royal Arctic Linep ilisimavaa. Taamaammat ingerlatseqatigiiffiup nammineerluni teknologiinik annertunerusumik ineriartortitsisinnaangilaq, teknologiinilli silap pissusianut tunngasunik teknologiinillu nalinginnaasunik ineriartortitsineq nunarsuaq tamakkerlugu ingerlanneqartoq malittariniaarpaa. Ineriartortitsinerlu taanna tunngavigalugu teknologiit ingerlatseqatigiiffiup silap pissusianut tunngatillugu anguniakkaminik angusaqarnissaanut ikiuutaasinnaasut Royal Arctic Linep toqqartorniarpai. Umiarsuit ingerlatsinikkut sivisuumik atasinnaassuseqarmata umiarsuarnut nutaanut teknologiinik ineriartortitsineq umiarsuillu pioreersut pitsanngorsarnissaannut periarfissat ukkatarineqassapput. Pingaartumillu teknologiit orsussamut tunngasut taakkulu issittumi pissutsini atornerqarsinnaanerannut periarfissat soqutigalugit malittarineqarumaarput.

Teknologiinik nutaanik misileraaqataanissaq Royal Arctic Linemi piumassuseqarfigineqarpoq, tamanna ingerlatseqatigiiffimmi teknologiinut pioreersunut ataqtigiissinneqarsinnaappat ingerlatsinermullu nalinginnaasumik taasarialimmik sunniuteqassanngippat.

Nunani tamalaani malitassat killiliussallu

Royal Arctic Linep silap pissusianut avatangiisinullu suliaqarfimmi suliniutigisai qulakkeerniarlugit ingerlatseqatigiiffiup killiliussat malitassallu nunani tamalaani akuerineqartut malinniarlugit toqqarsimavaa. Tamannalu ingerlatseqatigiiffiup piujuartitsinissaq pillugu periusissiaani suliniuteqarfigisaanilu ersersinneqarpoq.

Royal Arctic Linep EU-mi piujuartitsinermut ingerlatani taaguusersuilluni immikkoortiteriaaseq annertunerpaatigut malinniarppaa, ingerlatseqatigiiffiup ingerlatai avatangiisitigut piujuartitsiffiusutut inissisimasut aamma taaguusersuilluni immikkoortiteriaatsimut naapertuunnerat tassuuna qulakkeerneqassammat. Avatangiisinut tunngasunik piujuartitsinissamik iliuuserineqartut ingerlatarineqartullu immikkoortiternissaannut nunani tamalaani malitassat atornerisigut ingerlatseqatigiiffiup greenwashingimik pisoqannginnissaa isumannaassavaa.

Royal Arctic Line siunissami silap pissusiata allanngornerata pilersitaanik unammillernartunut periarfissanullu naleqqussarsinnaaqullugu ingerlatseqatigiiffiup TCFD malinniarlugit toqqarppaa. Ingerlatseqatigiiffiup silap pissusiata allannguutissai naatsorsuutigineqartut tunngavigalugit siunissami piviusuusaartitsinerit ingerlaavartumik suliarisassavai, taakkulu ingerlatseqatigiiffiup periusissiaanut, aningaasaqarnikkut aarlerinartunik aqutsinerani aammalu piffissaq ungasinnerusoq eqqarsaatigalugu ilimasaarusiaani ilaatinneqartassapput.

Ingerlatseqatigiiffiup silap pissusianut sunniutaata annikillisarnissaanik anguniagaqarnermini SBTi-p malinnissaa pimoorullugu anguniagaraa. Taamaammat ingerlatseqatigiiffiup gassinik silaannarmik kissakkiartortitsisunik aniatitsinini ukiup 2040-p tungaanut ingerlaavartumik annikilliarortissavaa.

Ingerlatseqatigiiffiup silap pissusianut sunniutaata ineriartorfiunera malinnaaffigiumallugu ukiumoortumik silap pissusianut tunngasunik naatsorsuusiortoqartassaaq ingerlatseqatigiiffiup ukiumoortumik nalunaarusiaanut ilanngullugit avammut saqqummiunneqartartussanik kingusinnerpaamillu ukiumut naatsorsuusiortiusumut 2024-mut. SBTi aamma TCFD naapertorlugit siunissami annikillisaanissamut

Immikkoortortaqqarfik: SESGC	Uannga naqqissorneqarpoq: RARI Akisussaasoq: AVLL Akuersisut: Siulersuisut	Matumani versioni akuerineqarpoq: Juunip 7-iani 2023 Version: 1
------------------------------	--	---

Silap pissusianut avatangiisinullu politikki



anguniakkat kingusinnerpaamik 2025-mi kvartalit aappaanni aalajangersarneqassapput silap pissusianut tunngasunik naatsorsuutit pineqartut tunngavigalugit.

IMO-p isumaqatigiissutaata najoqqutassiaatalu malinnissaat Royal Arctic Linemit immikkut ukkatarineqarpoq. Ingerlatseqatigiiffiup umiarsuaatai anginerit 2023-mi januaarip aallaqqaataa aallarnefigalugu Carbon Intensity Indicator (CII) naapertorlugu akuersissuteqalerput. Taamatullu akuersissuteqalernerup malitsigisaanik umiarsuit naammassisaqarsinnaassusiannik ukiuni pingasuni pitsanngorsaaniissamik anguniagaqarnissaminik ingerlatseqatigiiffik aalajangersaasussaavoq.

Pisuussutit

Nunatsinni illoqarfinni, erngup nukinganik nukissiuteqarfiusuni, nukissiutininik atuinerup annertunerusumik innaallagissameersuunissaa Royal Arctic Linep sulissutiginiarpaa, tamanna pisinnaatillugu aningaasartuutissallu gassinik silaannarmik kissakkiartortitsisunik annikillisaanermut naapertuuppata. Tassaasinnaapput qamutit motorillit sulinerup atornerqartartut innaallagissamik ingerlatillit, umiarsuarnut talittarfimmi innaallagialersuineq allallu. Taamaaliortoqassappat atortut sumiiffinni ataasiakkaani silap pissusianut sumiiffimmilu pissutsinut tunngatillugu tatiginartumik isumannaatsumillu ingerlasinnaasariaqarput. Aammattaaq aalajangersimasumik pisartumik suliarinninnissamut aserfallatsaaliuinissamullu periarfissaqassaaq.

Ingerlatseqatigiiffimmi Royal Arctic Linetut ittumi eqqagassaqtarnera avaqqunneqarsinnaangilaq. Ingerlateqatigiiffillu eqqakkat annikillisaanissaannik pimoorsulluni sulissuteqarpoq. Eqqagassat sumiiffinni pinngorfisigaanni pisinnaatillugu atoqqinniarneqartassapput. Atoqqinnissaat periarfissaanngippat najukkami najoqqutassat malillugit isumagineqartassapput. Pingaartumillu eqqakkat mingutsitsisinnaasut soorlu assersuutugalugit uuliamik akoorutissanillu eqqagassat mianersuuteqqissaarlugit isumagineqartassapput. Umiarsuarni eqqagassat immikkoortiterneqartarput immikkoortitigaanerilu malillugit nunamut tunniunneqartarlutik.

Uumassusillit assigiinngisitaarnerat

Uumassusillit peqqissuunissaat najukkami inuiaqatigiinnut ingerlatseqatigiiffiup sullissiffigisaanut qanoq pingaaruteqartiginera Royal Arctic Linep ilisimalluarpaa. Ingerlatseqatigiiffiup sullitaata ilarpassui pinngortitap pisuussutaanik tamakkiisumik ilaatigulluunniit inuussuteqarput, soorlu assersuutigalugu piniarnikkut aalisarnikkulluunniit. Taamaammat uumassusillit assigiinngisitaartuunerisa pitsaasumik inissisimajuarnissaannik qulakkeerinninnissap akisussaaqataaffiginissaa Royal Arctic Linemut pingaaruteqarpoq. Royal Arctic Line arlalialunnik suliniuteqarpoq biotopit nanertuutaanerininik annikillisaasussanik. Assersuutigalugu umiarsuit nunatta imartaata avataani angalasartut imermik oqimaaloqutaasa suliarineqartarnerisigut, tamanna uumasut avataaneersut siaruatsaaliorneqarnissaannut iluaqutaassamat. Umiarsuaatileqatigiiffiup umiarsuaataani eqqagassanik katersuinerup immikkoortiterinerullu ingerlatseqatigiiffimmit ukkatarineqarneratigut ingerlatseqatigiiffiup umiarsuaataata pisariaqanngitsumik plastikkinik imaani mingutsitsinnginnissaat qulakkeerneqassaaq, taamaaliornikkullu imaata plastikkinik mingutsinneqarnera sapinngisamik annikinnerpaamik pissalluni.

Royal Arctic Linep nunani imartanilu ingerlatseqatigiiffiup angalaffigisartagaani inatsisit isumaqatigiissutillu atuuttut tamaasa soorunami eqqortippai. Matumani politikkip aamma inatsisit isumaqatigiissutillu atuuttut akornanni naapertuutinngitsoqassagaluarpat inatsisit isumaqatigiissutillu atuuttut salliutinneqassapput.

Immikkoortortaqqarfik: SESGC	Uannga naqqissornerqarpoq: RARI Akisussaasoq: AVLL Akuersisut: Siulersuisut	Matumani versioni akuerineqarpoq: Juunip 7-iani 2023 Version: 1
------------------------------	---	---

5. Atsiorneq

Ulloq Siulersuisunut siulittaasoq

Ulloq Pisortaaneq

6. Najoqqutarisat

EU-mi piujuartitsinermut tunngasunik ingerlatanut taaguusersuilluni immikkoortiterineq ([EUROPA-PARLAMENTETS OG RÅDETS FORORDNING \(EU\)2020/852 juunip 18-ini 2020-meersoq](#))

SBTis-ip nittartagaa (www.sciencebasedtargets.org/)

TCFD-ip nittartagaa (www.fsb-tcf.org/)

7. Oqaaseqaatit/nassuiaatit/itisiliinerit

Matumani politikki ukiumut ataasiarlugu kvartalimi siullermi ilaursaanneqartassaaq pisariaqarpallu nutarterneqarluni.

Immikkoortortaqarfik: SESGC	Uannga naqqissorneqarpoq: RARI Akisussaasoq: AVLL Akuersisut: Siulersuisut	Matumani versioni akuerineqarpoq: Juunip 7-iani 2023 Version: 1
-----------------------------	--	---